

Inatsisartut suleriaasianni § 33 naapertorlugu aalajangiiffigisassatut siunnersuut una Naalackersuisut matumuuna saqqummiuppaat.

Uunga siunnersuut: Nerukkaatissanut akussat pillugit inatsisip Kalaallit Nunaannut Kunnigip peqqussutaatigut atuutilersinneqarnissaanik Namminersorlutik Oqartussanit akuerineqarnera pillugu Inatsisartut aalajangiinerat
(Aalisarnermut Piniarnermullu Naalackersuisoq)

Tunuliaqut

Namminersorlutik Oqartussat nerukkaatilerinermik suliaqarneq tigunikuunngilaat taamaammallu Inuussutissanut, Nunalerinermut Aalisarnermullu Ministeeriaqarfup Danmarkimi nerukkaatissat pillugit malittarisassiornermut ministeeriaqarfittut akisussaasutut malittarisassiorneq akisussaaffigaa.

Inuussutissanut Aqutsisoqarfik oqartussaaavoq akisussaasoq.

Danmarkimi nerukkaatissanut akussat pillugit inatsit Kalaallit Nunaannut atuutilersinneqarnikuunngilaq, taamaammallu Kalaallit Nunaanni maannakkut malittarisassaqaanngilaq nakkutilliisoqaranilu.

Immikkoortumi malittarisassiornissaq maannakkut pisariaqartinneqalerpoq, tassa Kalaallit Nunaanni suliffeqarfik aalisakkanit qajuusalianik uuliamillu nerukkaatissatut avammut tuniniaanissamik kissaateqarnikummat.

Kunnigip peqqutissaatut missingiummi taamaalilluni siunertaavoq Kalaallit Nunaanni nerukkaatissanik suliaqarnermut malittarisassiornissamut piginnaatitsisoqarnissaa. Tamanna pissaaq nerukkaatissat pillugit Danmarkimi inatsisip Kalaallit Nunaannut atuutilersinneratigut, tak. ataaniittoq. Peqqussutissatut siunnersuummi Kalaallit Nunaanni namminermi tuniniaaneq eqqussuinerlu aamma ilaapput.

Aalajangiiffigisassatut siunnersuutip (peqqussutip) imarisai

Danmarkimi inatsimmut sanilliullugu assigiinngissutit

Nerukkaatissat pillugit inatsimmi Kalaallit Nunaanni pissutsit tunngavigalugit assigiinngissuteqarluni Kunnigip peqqussutaatigut Kalaallit Nunaannut atuulersinneqarnissaanik § 9-mi piginnaatitsisoqarpoq.

Nerukkaatissanut akussat pillugit inatsit sinaakkutaasumik inatsisaavoq, pissutsit sukumiinerusumik taaneqartut pillugit malittarisassiornissamut piginnaatitsinernik arlalinnik imaqartoq.

Nerukkaatissanut akussat pillugit inatsisip Kalaallit Nunaannut atuutilersinneqarnissaanut missingiut ilanngunneqartoq nerukkaatissat pillugit Danmarkki inatsimmut sanilliullugu ukunninga assigiinngissuteqarpoq:

- § 1, imm. 2, Kalaallit Nunaanni atuutilersinneqanngilaq, tassa Kalaallit Nunaat EU-mi ilaasortaanngimmat pisariaqanngitsutut nalilerneqarmat.
- § 3 a: 2, Danmarkimi nerukkaatissat pillugit inatsimmi imm. 1-imi aamma 2-mi oqaaseqatigiit siulliit imatut oqaasertaqartut, "Avatangiisinut Inuussutissanullu Ministeriaqarfik imaluunniit Ilaqutariinnut Atuisunullu Pissutsinut Ministeriaqarfik oqartussatut misiliutissanik tiguisuunerat apeqqutaatinnagu..." aamma, "...Avatangiisinut Inuussutissanullu Ministeriaqarfik imaluunniit Ilaqutariinnut Atuisunullu Ministeriaqarfik oqartussatut piginnaatitsineq naapertorlugu misissuinissamik piunasaqarnersut apeqqutaatinnagu" pisariaarummata peerneqarput. § 3 a-p imarisaai allat misiliutissat siusinnerusukkut tiguneqartut taakkulu allanik akoqarnersut misissorniartorlugu atorineqarsinnaanerat immaqa pisariaqalersinnaanera mianeriniartorlugu peerneqanngillat. Iimagineqarpoq tamanna pillugu inatsimmi piginnaatitsinissaq ersarissumik piunasaqaataassasoq.
- § 5, imm. 2 er-mi ilanngunneqarpoq, oqartussanut allanut piginnaatitsinikkut Kalaallit Nunaanni Namminersorlutik Oqartussanut isumaqatiginninniartoqassasoq.
- § 6-itut aalajangersagaq ilanngunneqarpoq, Kalaallit Nunaanni Namminersorlutik Oqartussat pillugit inatsit naapertorlugu kap. 5-imi malittarisassanik aalajangersaanikkut oqaaseqaateqartitsisoqassasoq. Tamassuma assigai Inuussutissanut Ministeriaqarfimmut Kunngip peqqussutaani allani oqaasertaliinerit aamma Namminersorlutik Oqartussanut tusarniaanikkut pissasoq.

Tamassuma saniatigut Europami Peqatigiinneermut innersuussutit assigiinngitsut peerneqarput oqaasertaanillu ataasiakkaanik naleqqussaasoqarluni il.il.

Atuutilersitsineq piiviusunngortitsinerlu

Siunertaavoq peqqussut ulloq 1. januar 2023-mi atuutilersinneqassasoq.

Nerukkaatissanut akussat pillugit inatsit oqaatigineqartutut sinaakkutaasutut inatsisaavoq. Taamaammat malittarisassiorneq tasaanerussiaaq Kunngip peqqussutaani piginnaatitsinermut aalajangersakkat tunngavigalugit nalunaarusiorluni piiviusunngortitsineq.

Taamaalilluni peqqussumi piginnaatitsinikkut nalunaarutit arlallit Kalaallit Nunaannut aasaq manna tusarniutigineqartut peqqussumillu tusarniaanerup kinguninngua suliaqarneq aallartissimavoq. Nalunaarutini ilaatigut aalajangersarneqarpoq suliffeqarfinnik nerukkaatissanik tunisassiorunik nalunaarsuinissaq akuersinissarlunniit piunasaqaateqartoqarpat, tassunga ilanngullugit tunisassiorut pingaarnert, suliffeqarfiit pisussaaffii, tunisassianik nalunaaqutsiisarneq pillugu malittarisassat, eqqussuineq avammullu tuniniaaneq pillugit malittarisassat aamma suliffeqarfinnik nakkutilliineq nakkutilliinermullu akiliutit pillugit malittarisassat.

Peqqussutip sinaakkutaasa iluanni malittarisassanik assigiinngitsunik aalajangersaasoqarsinnaavoq, apeqqutaatillugu nerukkaatissaq/nerukkaatissat uumasunit inuussutissanik tunisassiornermut imaluunniit uumasunit inuussutissanut ilanngunneqartussaannngitsunut naatsorsuussaansut. Aamma nerukkaatissanut/nerukkaatissat akuinut avammut tuniniaanissaq siunertaralugu tunisassiarineqartunut aamma nerukkaatissanut taamaallaat nunami namminermi atugassanut tunisassiarineqartunut piunasaqaatinik assigiinngiaartunik aalajangersaasoqarsinnaavoq.

Siulliullugu malittarisassat tunisassiornermut atuinermullu tunngasut aalajangersarneqassapput, tassunga ilanngullugit Kalaallit Nunaanni ullumikkut eqqussuineq avammullu tuniniaaneq. Taamaalilluni Kalaallit Nunaanni nerukkaatissanut avammut tuniniarneqartunut malittarisassani taamaallaat ilaapput aalisakkanit qajuusalianik, aalisakkanit uuliamik aamma aalisakkanik panertunik (ammassannik) avammut tuniniarneqartussanik tunisassiorneq. Malittarisassani inuit avammut annissuinerat ilaanngilaq.

Nerukkaatissanut akussat pillugit malittarisassat imarisaat annertussusiallu assersuutigalugu nerukkaatissat assigiinngitsut nutaat niuerutigineqartarnerat imaluunniit avammut tuniniaanerup annertusinissaanik kissaateqarneq peqatigalugit malittarisassiornissamik pisariaqartitsinerup allannguutaannut siunissami ingerlaavartumik naleqqussaasoqarsinnaassaaq. Tamanna pisinnaassaaq nalunaarusiarineqartut allanngortinnerisigut imaluunnit nutaanik nutartikkanillunniit nalunaarusiornikkut.

Inuussutissanut Aqutsisoqarfik oqartussatut akisussaasutut suliffeqarfinnik nerukkaatissanik tunisassiorunik nalunaarsuisassaaq akuersisinnaassallunilu aamma nerukkaatissalerinermut malittarisassat eqqortinneqarnerannik nakkutilliissalluni misissuisassallunilu.

Siunertaavoq Avatangiisit Inuussutissallu pillugit Maalaarutini Aalajangiisartut siullermik peqqusut imaluunniit taanna naapertorlugu nalunaarusiarineqartut naapertorlugit maalaaruteqarfittut siullertut aalajangiinernut maalaartarfiussasoq, tak. peqqussummi § 5 a. Tamassuma assigaa maalaaruteqarsinnaaneq Inuussutissat il.il. pillugit inatsisip Kalaallit Nunaannut atuutilersinneqarnera pillugu Kunngip peqqussutaa nr. 523, 8. juni 2004-meersoq, uumasut nappaataat tuniluuttullu pillugit inatsisip Kalaallit Nunaannut inatsisip

atuutilersinneqarnera pillugu Kunngip peqqussutaa nr. 524 aamma uumasut nakorsaattut suliaqarnek il.il. pillugit inatsisip Inuussutissanut Aqutsisoqarfimmit ullumikkut allaffissornikkut aqunneqareersup Kalaallit Nunaannut aatuutilersinneqara pillugu Kunngip peqqussutaa nr. 525 naapertorlugit aalajangiinernut atuutereersoq.

Pisortanut aningaasatigut allaffissornikkullu kingunissai

Siunertaavoq peqqussummik allaffissornikkut aqutsineq akiliisarnikkut aningaasalersorneqassasoq, tamassumalu Kalaallit Nunaanni suliffeqarfiit nerukkaatissanik tunisassiortut aningaasatigut artukkerneqarnerat kingunerissavaa. Nalunaarsuinissaq imaluunniit akuersinissaq il.il. piunasaqaatit Kalaallit Nunaanni suliffeqarfiit nerukkaatissanik tunisassiortut allaffissornikkut artukkerneqarnerat kingunerissavaat. Artukkiissutit qulaani taaneqartut annertussusaat maannakkut naatsorsorneqarnikuunngilaq. Naliliisoqarpoq suliffeqarfiit amerlassusaat killeqartut inuussutissalerinermi malittarisassanut ilaatinneqassasut.

Inussutissarsiortunut namminersortunut aningaasatigut allaffissornikkullu kingunissai

Tak. immikkoortoq qulaaniittoq.

Tusarniaaneq

Peqqussutissatut missingiut Kalaallit Nunaanni namminermi avataanullu tusarniutigineqarnikuuvoq, tassunga ilanngullugu Namminersorlutik Oqartussaata tusarniaanermi nittartagaanni piffissami 17. majimit 14 junimut 2022, oqaaseqaatinillu tigusaqartoqarnikuunngilaq.

Ilanngussaq: Nerukkaatissanut akussat pillugit inatsisip Kalaallit Nunaannut atuutilersinneqarnissaa pillugu Kunngip peqqussutissaanut missingiut.